

REGIONAL NEWS

HEADLINES:-

1. Chief Minister Pu Lalduhoma chuan Finance Commission 16-na rawt dan angin sorkar laipui chuan kum 2026-27 budget a pharh niin a sawi.
2. PWD Minister Pu Vanlalhlana chuan, ram hmasawinna hnathawh leh environment humhalh chu inkhuangrual tak leh fimkhur taka kalpui a ngai a ti.
3. Sawrkar laipui chuan India in sumdawnna kawnga a hlawkna tur inremna tha tak US nen a siam tih sawiin agriuculture leh bawngnute lam tharchhuahte hlawkna a tel chhonzawm dawn a ti.
4. President Droupadi Murmu chuan nungchate khawvel ti chhe lova mi tinin hmasawinna an neih hunah ram a hausa dawn a ti.

<><><>

CM ON BUDGET

Chief Minister Pu Lalduhoma chuan Finance Commission 16-na rawt dan angin sorkar laipui chuan kum 2026-27 budget a pharh niin a sawi.

Social media kaltlang a hemi chungchang a sawina-ah Chief Minister chuan FC 16-na-in Mizoram an rawn tlawh tuma Horizontal Devolution Criteria leh weightage atana Mizoram sorkar rawtna zaa sawmriat vel dawn chu a pawm tih a hmuh theih niin a sawi a. Horizontal Devolution-a Mizoram chan tur hi FC 15-na-ah za zela bial point 5 a nih laiin FC 16-na-ah chuan za zela bial point 564-ah an rawn tisang a ni a ti a. FC 16-na hun chhung, tangka kum 2026 leh 2031 inkara a Mizoramin central chhiah atanga a chanpual dawn tur chu a pung dawn tihna a ni, a ti. Mizoram chan tur zat pung ta hi a za zela chhutin lang tam lo mahse a sum hrawm a len avangin a sumfai ang chuan a tam tham viau ang, a ti bawk.

Kum tina Mizoram sum hmuh tur hi a hma aiin cheng vaibelchhe 1,500 velin a sang tawh zawk dawn ni a sawiin Finance Commission thil kalpui dan hmanga sum ruahmanna siam thenkhat SASCI leh a dangah te pawh Mizoram chanpual hi a tam phah thei dawn a ni, a ti a. Hmar chhak state zinga horizontal devolution share pung state tlemte zinga Mizoram a tel ve hi a lawmawm hle a ni, a ti bawk.

Hei bakah hian Village Council leh Local Council te tana ruahmanna hranpa Rural Local Body Grant leh Urban Local Body Grant te hi an titawp mai ang tih kha sorkarin a hlauh avangin kalpui chhonzawm zel turin an ngen a. Sorkar ngenna ang takin hei pawh hi an awmtir zui ta zel niin a sawi. Finance Commission 16-na a Mizoram sorkarin rawtna a siamte chu an bawhzui nasa hle a, Mizoram an rawn tlawh lai a theihtawp chhuah a nih bakah an haw hnu-ah pawh Delhi lamah inkhawm an zuk huaihawtpui a ni a ti a.

FC 16-na hnena Mizoram sorkarin Memorandum thehluh tak, fel fai leh zahawm tak buatsaihtu Finance officials-te chungah lawmthu a sawi a. A bik takin Pu Lalhmingmawia, MFAS, Addl. Secretary, Finance Department leh a hote hian an hahpui zual a. An chungah lawmthu a sawi a ni.

<><><>

CIJWS

Counter Insurgency and Jungle Warfare(CIJW) school te chuan nimin khan Vairengte College tlawhin he hunah hian naupang te leh zirtirtu te nen hun an hmang pui a.

CIJW Commandant Maj Gen Kulvir Singh chuan thusawi na hun hmangin zirlai te fuihna thu a sawi a, he hun a hman zawh hian Vairengte college building sak mek chu en in Vairengte SDO(C) Pu H Vanlalbiakzauva nen Vairengte College in hma a sawn zel theih nan a tih tur tul te sawi dun in Vairengte khawchhung in an mamawh hrang hrang te SDO(C) hian a hrilh hre bawk ani.

Maj Gen Kulvir Singh chuan an theihtawp a khawtlang tana thawh an duh thu sawiin mamawh an neih te hrilh hreh lo turin a ngen a , a theih ang ang a puih an in huam reng thu a sawi bawk .

<><><>

SOUTHERN MIZORAM POWER SUPPLY

Mizoram Chhimlamin Kawlphetha hnianghnar zawk an neih nan a 132 KV Sub Station tihpuitlin nan cheng Nuai 90 chuang senbelh a la ngai.

Lawngtlai bul Chawnhu a 132 KV Sub Station sakmek chu nimin khan Lawngtlai West bialtu MLA Pu C.Ngunlianchunga'n tlawhin, Mizoram chhimlam, Lawngtlai leh Siaha District ten Kawlphetha hnianghnar zawk an neihtheih nan a hmalakna awmmek leh hna engemawzat zawhfel a ni tawh chu lawmawm a tihthu a sawi a, Kawlphetha chu kawng engkima mamawh a nih tawh vangin chhimlam mipui ten 132 KV Sub Station a taka hmantheih hun an nghakhlel hle niin a sawi.

Pu C.Ngunlianchunga hi P&E Department a SDO, Pu Malsawmdawngliana leh thawktu dang ten lo dawngsawngin, 132 KV Sub Station tihpui tlin nan cheng Nuai 90 chuang an la mamawh thu MLA hi an hrilha, thuneitu sang lam ah an thlenfel tawh thu leh kum kalta March thla atang khan hna thawh chhunzawm hleithei a nih rihloh thu an sawi bawk.

Chawnhu a 132 KV Sub Station a bungrua thenkhat, cheng nuai 20 man hu vel a bo tih thawktute chuan sawiin, Police ten an chhui mek thu an sawilang bawk.

Pu C.Ngunlianchunga hi Lai District Youth Congress Committee President Pu Lalawmlova Chinzah in a tawiawm.

<><><>

PWD MINISTER

PWD Minister Pu Vanlalhlana chuan, ram hmasawwna hnathawh leh environment humhalh chu inkhuangrual tak leh fimkhur taka kalpui a ngai a ti.

He thu hi nimina Department of Environmental Science, Pachhunga University College leh Society of Agro Environmental Sustainability, Dehradun Uttarakhand ten a ni hnih chhung awh tur International Conference PUC Seminar Hall-a an buatsaihah sawiin, PWD Minister chuan, ram hmasawwna hna thawk tak tak tur chuan kawng laih te, in lian tak takte leh infrastructure hrang hrangte din a ngai a a, chutiang ti

tur chuan ram ngaw, thing leh mau ten an tawrh chang a awm fo thin a ti a, hun lo awm leh zel turah pawh inkhuangrual taka development leh environmental conservation te kalpui a nih zel theih nan, zirlaite leh hemi lam kawnga research ti tute chu nasa lehzuala zirbingna kalpui tura chahin, an thiamna leh theihnate ram tana hmang tur leh sawrkar thawhpuitu ni turin a sawm a, vawiina International Conference-an hman pawh hlawk taka hmang theuh turin duhsakna a hlan nghal bawh a ni.

He huna thusawitu dang, khual zahawm Higher and Technical Education Minister Dr. Vanlalhlana pawhin thusawiin, tu chhuante chauh ni lo, chhuan lo la awm lehzel turte tana chenna tlak, ram nuam leh hrisel nei turin zirlaite leh hmasawnna hna duangtu te chu tangrual a, uar lehzual a zirbingna kalpui deuh deuh a ngaih thu a sawi.

<><><>

PM POSHAN DAY

Lawngtlai-a PM Shri Model English Schoolah nimin khan 'PM Poshan Day' hman a ni a. Adviser to Chief Minister leh Lawngtlai East bialtu MLA nibawh Dr. Lorrain Lalpeklana Chinzah leh Lawngtlai Bawrhsap Pu Donny Lalruatsanga ten he hun hi an hman pui a ni.

Dr. Lorrain Lalpeklana Chinzah chuan PM Poshan chu zirlai naupangten eitha an ei theih nan a duan a nih angin, theihtawp chhuah zel a ngai a ni, ti . Zirlai naupangte chu ram leh hnam innghahna a nih angin, tha taka enkawl leh dawmkan hi mitin mawhphurhna a ni, a ti. MLA chuan zirlai naupangte hlut leh pawimawh zia hriatchian zel a pawimawh tiin, a bik takin zirtirtute an mawhphurhna hlen theuh turin a chah a ni.

PM Poshan Guidelines - in a phut ang taka zirlai naupangten chaw tha an mamawh pek hi a tulin a pawimawh tak zet tih a tarlang a . Lawngtlai District- chhunga School ten PM Poshan tha taka an kalpui thin chu lawmawm a tih thu a sawi a . Zirlai naupangten ei leh in tha an hmuh zel theih nan sawrkarin theihtawp a chhuah zel tur thu a tarlang. Adviser to Chief Minister chuan Lawngtlai District- chu PM Poshan - kalpui tha ber a nih theih nana theihtawp chhuah turin mawhphurtute a chah nghal bawh a ni.

He hun hmannaah hian Zirlai naupang, Zirtirtu, PM Poshan hotute leh SSA hotute an tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CHAMPHAI PTC

Champhai North bialtu MLA H. Gilzalalan nimin khan Ngaizawl khuua ruahtui dahkhawlina hna thawh kal lai mek a tlawh a.

MLA chuan he project hi a puitling thei a nih chuan sangha khawi nan te, lo neitu ten an thlai chin chawmna atana an lak atan te bakah tui hna humhalhna atan hman tum a nih thu a sawi a. He tui khuah hi Eco-Tourism lam tih hmasawnna atan te, tui lama infiamna atan te pawh hman theih a beisei thu a sawi bawh.

He project atan hian MP Fund aṭangin cheng nuai 15 hman ral tawh a ni a, MGNREGA aṭangin cheng nuai 10 hman a ni tawh bawk.

<><><>

WORLD WETLANDS DAY

Kawrthah Forest Division leh Zamuang Range hmalaknain nimin khan World Wetland Day, 2026 chu Rengdil (Lungkulh)-ah an hmang.

World Wetland Day chu Mizorama tuihna hmun pawimawh, Rengdil (Lungkulh)-ah hlawhtling taka hman a ni a. Wetland chungchang inzirtirna atan leh Ramsa leh Sava te leh tuia cheng chi te tana wetland pawimawhzia inhrilhna hun hman a ni a.

He hunah hian Kawrthah DFO Pu Karthikeyan V chuan Zamuang Middle School zirlaite pualin tuihna hmun (wetland) leh a rinchhana nungcha chengte humhalh pawimawhzia a sawi a. Zirlaite tan sava thlir hona (birding watching session) hlimawm tak neihpui an ni bawk.

Zirlaite leh Forest Department thawktute leh Zamuang Middle School naupangte chuan Rengdil chhehvel tifaiin hnatlang neih zui a ni a. He lai hmun tlawhtute'n bawlhhlawh hnutchhiat lova thianghlim taka enkawl zel turin Kawrthah Forest Division chuan mipuite a ngen a ni.

<><><>

INDIA-US TRADE

Sawrkhar laipui chuan India in sumdawnna kawnga a hlawkna tur inremna tha tak US nen a siam tih sawiin agriuculture leh bawngnhnute lam tharchhuahte hlawkna a tel chhunzawm dawn a ti. Nimina New Delhi-a chanchinbumite kawmin Union Commerce and Industry Minister Piyush Goyal chuan New Delhi leh Washinton inremna chu thil chhinchhiahtlak tak leh hmalam hun thui tak a tha zawnga nghawnga tur a ni a ti a. He inremna hian loneitute, sanghamantute, MSME, hmeichhia mahni kutkea eizawngte leh thingtlang leh khawpuia thalaite tan sum thawhchhuahna tur a siamsak dawn a ni a ti a. Sector hrang hrang MSME, Textile, tlereuh, savuna thilsiamna, tuifinriat leh a chhehvela eizawnna a ti hmasawn dawn a ni a ti bawk.

Prime Minister Narendra Modia chaun India leh United States ten sumdawnnaa inremna thar chhinchhiahtlak tak an siam chu dawhthei taka indawrna vang a ni a ti. Nimina NDA Parliamentary party inhmuhkhawmah NDA MP te hmaah he thu hi sawiin Pu Modia chuan US nena inremna thar chuan eibar zawwnaah boruak tha zawk a siam tihi sawiin sawrkarin khawvel insumdawntawnna kawngah sawrkarin kalphung nghet leh awmze nei a kalpui tih a tarlang a ti bawk.

Puan tawh angin Prime Minister Narendra Modia leh US President Donald Trump te an inbiak hnuah ram pahnih sumdawnna lama inremna thar siam puitlin a ni a. Social Media lamah he thu hi puangin Pu Modia chuan India thilsiam US-a thawnluhah te chiah tihhniam niin tariff zaa 18 lak a ni tawh dawn a ti bawk.

<><><>

PRESIDENT

President Droupadi Murmu chuan nungchate khawvel ti chhe lova mi tinin hmasawnna an neih hunah ram a hausa dawn a ti. Nimina Fakir Mohan University CONvocation vawi 12 na Balasore a neih a hmanpuinaah he thu hi sawiin Pi Murmu i chuan technology lama theihna te tangkai taka kalpui chungin heng hmasawnna hi a thlen theih dawn a ni a ti bawk.

<><><>